

Friûl di Jevât


PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Cormòns

Premi Dolfo Zorzut

Ogni doi agns il Comun di Cormòns, in colaborazion cu la Associazion "Amîs da Mont Quarine", cu la Societât Filologjiche Furlane e cu la ARLeF, al da fûr il Premi leterari intitulât al scritôr furlan Dolfo Zorzut. Nassût a Cormòns tal 1894 e muart tal 1960, Zorzut al è stât insegnant, folclorist e scritôr, ma ancje cultôr da lis sciencis demologjichis e al à lavorât une vore inte racelte di contis populârs furlanis. Al è stât ancje un dai paris fondadôrs da la Societât Filologjiche, nassude a Gurize tal 1919. Chest an al è vignût fû l'avis pe edizion numar 7 dal premi, patrocinât ancje da la Associazion culturâl bisiache e dal Comun di Brda, sul



teme "E quindi uscimmo a riveder le stelle". Il Premi si divîr in trê sezions: narrative, poesie e une categorie pai students. Lis voris - che a puedin

jessi scritis par talian, furlan, sloven, todesc, bisiac e graisan - a àn di rivâ drenti di misdi dai 18 di Otubar dal 2021. Si pues mandâlis in formât digjital par pueste eletroniche certificade a la direzion comune.cormons@certgov.fvg.it, o pûr consegnâlis a man o spedîlis par raccomandade a la Biblioteche comunâl di Cormòns, in vie Matteotti 77. Il bant par intîr si pues discjamâlu dal sît www.comune.cormons.go.it, ma ancje dai sîts da la Societât Filologjiche (filologicafriulana.it) e de ARLeF (arlef.it). Par informazions clamâ o scrivi a la Biblioteche di Cormòns (tel. 0481/637165, biblioteca@com-cormons.regione.fvg.it).

Un gnûf cuader dai "Amîs da mont Quarine" memoreant l'insegnant e scritôr



Al è vignût fûr, cul titul "La sô mont", il cuader numar dodis dai "Quaderni del Quarin", la publicazion editade dai "Amîs da mont Quarine" di Cormòns. Al è un volum speciâl, dedicât par intîr al professôr Eraldo Sgubin, che al è stât il prin president da la associazion (e par agnorums ancje vice dean da la Societât Filologjiche Furlane pal Friûl di soreli jevât), e che al è mancjât tal mès di Zenâr trê agns indaûr, a la età di 92 agns. Cheste iniziative editoriâl e je nassude cun chê di onorâ la sô lungje ativitât di insegnant, documentarist, sagjist e scritôr, ma ancje, a mieç da la sô figure di cjantôr, cun chê di celebrâ la mont Quarine, che Sgubin al à amât par dute la vite. Par chest i "Amîs da mont Quarine" a àn volût tornâ a stampâ il numar unic "Floride di puisie su la Mont Quarine", che al jere stât publicât tal mès di Mai dal 1998 e al è stât il prin di chei che, plui tart, a son diventâts i Cuaders, tancj di chei rincurâts propit di bande dal Sgubin. E je une recuelle di poesiis e di prosis scritis di cetancj autôrs furlans, di Dolfo Zorzut a Ermete Zardini, Maria Gioitti del Monaco, Aurelio Cantoni (Lelo Cjanton), Alojz Gradnik, Alfonso Deperis, che tai lôr

"La sô mont" in onôr di Eraldo Sgubin

componiments e cu la lôr scriture a àn savût dâ lûs a lis bielecis da la mont Quarine che - par doprâ lis peraulis di Zorzut - e je un "biel blec di Paradis". Sgubin al jere une vore leât al Quarin, al veve ancje tornât a comprâ la cjase dai siei là ch'al jere nassût tal 1925, la "cjase dai pins", di li che ancjemò in di di vuê si pues vualmâ un panorame maraveôs di Cormòns e da la sô planure. Cun di plui al à contât, a traviers da lis storiis di tantis fameis, la vite, il lavôr, lis tradizions da la mont Quarine. Ducj documents che a vuê a son impuartants par visâsi di un mont che nol è plui e che a restin come memorie storiche par lis gnovis gjenerazions, stant che cence memorie dal passât nol pues sei nancje avignî. E l'auguri che "la mont" - cussî chei di Cormòns a clamin il Quarin - al resti no dome un simbul ma massime un lûc di recuperâ e difindi sot di tancj

aspiets, dal pont di viste naturalistic e dal paisaç, come risorse pal teritori. La fie Rosalba e à scrit une biografie dal pari, che e insiore il volum ricuardant la sô vite, lis sôs passions, l'insegnament intes scuclis di Cormòns e Lucinîs, la sô largje ativitât leterarie e l'interès par la multimedialitât. Il professôr Sgubin nol veve estri dome tal scrivi, ma al saveve ancje doprâ la machine fotografiche e la telecamare tant che un professionist: al à insiorât il so archivi cun miârs di imagjinis e filmâts sui avigniments plui impuartants che a capitavin tal teritori. Daûr concession de famee, a son publicadis ancje cuatri letaris ineditis di so pari e sô mari, Pietro e Luigia, scritis cuant che a jerin zovins e di li che a vegnin fûr, in maniere semplice ma profonde, i lôr sintiments.

Franco Femia

Minorancis animadis

IN FRIULI VENEZIA GIULIA LE COMUNITÀ SLOVENA, FRIULANA E TEDESCA sono tutelate da leggi statali, norme europee e da tre leggi regionali speciali.



Al è stât presentât che nol è tant il projet "Minoranze animate / Animirane manjšine", finanziât cui fonds dal bant burîf fûr da la Region pai 20 agns da la leç n. 482/1999 su la tutele da lis minorancis lenghisticis storichis. Inte suaze dal projet il Slori (Istitût Sloven di Ricerçjis) al à realizât cuatri piçui video animâts cun chê di slargjâ la cognossince da lis minorancis nazionâls che a son in Europe e tal Friûl Vignesie Julie, cun riferiment particolâr a la comunitât slovene in Italie. Insieme cul Slori a àn partecipât al projet doi istitûts che a rapresentin chês altris comunitâts lenghisticis ricognossudis in maniere uficiâl in region: la Societât Filologjiche Furlane pe comunitât furlane e il Circul Culturâl "Fulgencio Schneider" di Sauris pe comunitât di lenghe todescje. I filmâts si puedin cjâlâ on line sul sît www.slorig.org.

Premi "Ciceri", XX[^] edizion

In chest 2021 la Societât Filologjiche Furlane e ricuarde un grant om da la sô storie, il dotôr Luigi Ciceri (Tresesin, 1911-1981), muart ai 17 di Lui za fa 40 agns. Dilunc da la sô vite Ciceri al à prudelât cence padin la identitât furlane, al è stât cultôr da la storie e da lis tradizions dal nestri popul e al à simpri vude la passion - insieme cu la sô femine Andreina Nicoloso - di tirâ dongje testimoniancîs par documentâ la specialitât da la tiere e da la int furlane.

Pe Societât Filologjiche al à tornât a meti in pîts la biblioteche, al à dât un sburt al setôr editoriâl cu la publicazion di gnûfs volums e gnovis golainis, al è stât diretôr dai periodics "Sot la Nape" e "Strolic furlan" e colaboratôr dal "Ce fastu?". Il so contribût al è stât determinant co si comprâ tant che sede da la Societât il palaç Mantica di vie Manin a Udin.

A Luigi e Andreina Ciceri ur è intitulât il "Premi Ciceri", che ogni doi agns al premie studis su apiets da la culture e dal teritori dal Friûl e che chest an al è rivât a la edizion numar XX. Lis voris a àn di rivâ drenti dai 20 di Avost.



Il Premi al è dividût in dôs sezions: scrits (saçs libars, tesis di lauree magjistrâl e di dottorât) e projets par percors espositifs. Il bant si lu cjate sul sît www.filologicafriulana.it. Par informazions, clamâ o scrivi a la Biblioteche da la Filologjiche in vie Manin a Udin, tel. 0432 501598 int. 2, biblioteca@filologicafriulana.it